

Bil. 28

Rabu

17 Julai 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KEDUA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Kementerian Luar Negeri Harus Menyiasat dan Menolong
Kembalikan Encik Hemakavin a/l Karthigesu
(Nombor kad pengenalan: 971120-10-7171)**
- *YB. Tuan Charles Anthony Santiago (Klang)* [Halaman 1]
- **Isu Infrastruktur Asas di Hulu Selangor**
- *YB. Puan June Leow Hsiad Hui (Hulu Selangor)* [Halaman 3]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT PERTAMA**

Rabu, 17 Julai 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Kementerian Luar Negeri Harus Menyiasat dan Menolong Kembalikan Encik Hemakavin a/l Karthigesu (Nombor kad pengenalan: 971120-10-7171)

2.34 ptg.

Tuan Charles Anthony Santiago [Klang]: Tuan Yang di-Pertua dan Yang Berhormat Menteri, saya telah menerima aduan daripada Encik Karthigesu a/l Muniyandy (Nombor Kad pengenalan: 701212- 10-6213) bahawa anaknya Encik Hemakavin telah menjadi mangsa keldai dadah ataupun *drug mules*. Hal ini berlaku apabila beliau diberi tiket kapal terbang percuma untuk melancong ke negara Kemboja, pada bulan November 2016. Pada masa itu, beliau masih berusia 19 tahun.

Encik Karthigesu telah membuat laporan polis pada 11 April 2017 berkenaan kehilangan anak beliau, nombor rujukan laporan tersebut adalah seperti berikut, KLANG/012128/17. Beliau juga mensyaki bahawa ini merupakan satu sindiket dan anak beliau telah diperalatkan. Beliau berusia 22 tahun sekarang dan telah melalui dua tahun hukuman di penjara Kemboja sejak tahun 2016.

Oleh itu, saya berharap Menteri Luar Negeri dapat membuat rundingan dengan negara Kemboja, untuk membawa pulang Encik Hemakavin. Sememangnya jelas bahawa, Encik Hemakavin telah diperalatkan semasa beliau muda lagi dan tidak tahu akan sindiket- sindiket sebegini beroperasi. Sekian, terima kasih.

2.35 ptg.

Menteri Luar Negeri [Dato' Saifuddin Abdullah]: Tuan Yang di-Pertua, saya ingin mengucapkan terima kasih kepada Yang Berhormat Klang di atas keprihatinan Yang Berhormat kepada isu yang melibatkan kebajikan warganegara Malaysia yang ditahan seperti mana yang disebutkan tadi.

Untuk makluman Dewan ini, Encik Hemakavin a/l Karthigesu telah ditahan oleh pihak berkuasa Kemboja pada 9 November 2016 bersama dengan seorang lagi warganegara Malaysia atas kesalahan memiliki dan menyeludup dadah. Encik Hemakavin telah diwakili oleh peguam dan menjalani proses perundangan yang sewajarnya. Beliau telah didapati bersalah dan dijatuhkan hukuman penjara selama 25 tahun. Kes ini juga telah dibawa ke Mahkamah Rayuan Kemboja namun telah ditolak.

Dalam hubungan ini, Duta Besar Malaysia ke Kemboja pada 31 Mei 2019 telah menulis surat kepada Pengarah Jabatan Siasatan Jenayah Narkotik, Polis Diraja Malaysia (PDRM) supaya membuat siasatan rapi serta mengemukakan butir-butir yang berkaitan berhubung seorang suspek yang disyaki menjadi dalang dalam sindiket pengedaran dadah tersebut. Maksud saya Tuan Yang di-Pertua, seorang suspek yang lain. Adalah diharapkan siasatan dan penangkapan suspek tersebut akan dapat membantu Encik Hemakavin dibicarakan semula di mahkamah negara itu dan memberikan keadilan kepada beliau.

Dalam hal ini Tuan Yang di-Pertua, Malaysia menghormati sistem perundangan sesebuah negara lain yang berdaulat sebagaimana kita mahu mereka menghormati sistem perundangan negara ini. Malaysia tidak boleh mencampuri urusan perundangan sesebuah negara lain yang boleh mencerminkan imej Malaysia sebagai negara yang tidak menghormati sistem undang-undang yang diguna pakai oleh negara Kemboja.

Dalam hal ini, Kementerian Luar Negeri prihatin akan nasib yang menimpa Encik Hemakavin dan akan terus memantau perkembangan perkara ini sewajarnya. Pihak Kedutaan Besar Malaysia di Phnom Penh membuat lawatan konsuler secara berkala ke atas Encik Hemakavin bagi memastikan hak dan kebajikan beliau sentiasa terpelihara dan sentiasa memberi bantuan sewajarnya berhubung perkara ini. Lawatan terkini ke penjara yang dibuat oleh pegawai Kedutaan Besar Malaysia di Phnom Penh adalah pada 20 Jun 2019. Tuan Yang di-Pertua dan Ahli Yang Berhormat, lazimnya dalam hal-hal yang sedemikian, kita tidak berputus asa dan mencari jalan-jalan yang boleh kita lakukan untuk membantu dalam keadaan-keadaan yang kita boleh membantu. Terima kasih Tuan Yang di-Pertua.

■1440

Isu Infrastruktur Asas di Hulu Selangor

Puan June Leow Hsiad Hui [Hulu Selangor]: Terima kasih Tuan Yang di-Pertua. Telah lebih 10 tahun permohonan Hulu Selangor untuk menaik taraf jalan raya masih tiada sebarang maklum balas mahupun tindakan. Ini amat membahayakan nyawa masyarakat kerana menggunakan jalan raya yang tidak selamat.

Apakah keputusan mengenai permohonan ini dan apa tindakan yang dapat diambil untuk membaiki jalan raya di Hulu Selangor terutamanya jalan FT01? Apakah perancangan menaik taraf dan memulihara infrastruktur di daerah Hulu Selangor?

Kesejahteraan rakyat di luar bandar perlulah kita jaga untuk memastikan keselesaan dapat dinikmati secara adil dan saksama. Hulu Selangor masih ketinggalan berbanding daerah lain. Keselamatan jalan raya di daerah ini amat membimbangkan. Diharapkan kementerian dapat membantu perbaiki jalan raya agar kita dapat mengurangkan kadar kematian disebabkan jalan raya yang tidak selamat dan seterusnya memberi keselesaan kepada orang awam untuk menggunakan infrastruktur ini.

Selain itu, baru-baru ini mukim Serendah, Hulu Selangor telah diumumkan sebagai satu kawasan industri mampan dengan dibangunkan sebuah dengan izin, *UMW High Value Manufacturing Park* (HVM). Dengan keluasan tapak 861 ekar, pelbagai industri berteknologi tinggi akan berkembang pesat terutamanya dalam kluster aeroangkasa dan automotif. Pihak UMW juga bercadang untuk memindahkan seluruh operasi mereka dari Shah Alam ke Serendah.

Oleh itu, kerja-kerja naik taraf infrastruktur perlulah diutamakan di Hulu Selangor bagi menarik lebih banyak pelabur luar untuk melabur di kawasan perindustrian berteknologi tinggi Serendah, Hulu Selangor. Apakah pelan tindakan yang kementerian akan ambil untuk menyediakan infrastruktur lengkap di kawasan ini? Bilakah kerja-kerja pembinaan infrastruktur akan dimulakan di kawasan ini? Sekian, terima kasih.

2.42 ptg.

Menteri Kerja Raya [Tuan Baru Bian]: Terima kasih Yang Berhormat Hulu Selangor. Tuan Yang di-Pertua, secara amnya pihak kerajaan tidak pernah meminggirkan aspek pembangunan infrastruktur jalan raya di kawasan Hulu Selangor. Bagi maksud tersebut, kementerian ini telah mengangkat beberapa permohonan menaik taraf jalan raya dan jambatan terutamanya di Jalan

Persekutuan yang melalui kawasan Hulu Selangor, di dalam Rancangan Malaysia Ke-11 (RMKe-11) seperti berikut:

- (i) Mengganti dan Melebarkan Jambatan (FT001/438/10) di atas Sungai Batang Kali, Hulu Selangor dengan kos kontrak sebanyak RM24,259,596.72. Status terkini projek adalah di dalam pembinaan, kemajuan semasa adalah 30 peratus dan dijangka siap pada pertengahan tahun hadapan (2020);
- (ii) menggantikan Jambatan Sungai Kerling FT001/454/500 Hulu Selangor dengan kos kontrak sebanyak RM6,451,160. Status terkini projek ini, kemajuan semasa adalah 97 peratus dan dijangka siap pada akhir bulan Julai 2019;
- (iii) menggantikan Jambatan Sedia Ada di FT001/442/70 Hulu Selangor, Selangor (Sungai Selangor) dengan kos kontrak sebanyak RM10,468,319.35. Projek ini telah disiapkan pada 29 Januari 2018;
- (iv) projek Menggantikan Jambatan Sedia Ada FT055/013/70 Hulu Selangor, Selangor (Sungai Chiling) dengan kos kontrak sebanyak RM4,759,044.90. Projek ini telah disiapkan pada 1 Ogos 2018;
- (v) projek Menggantikan Jambatan Sedia Ada Di FT055/002/10 Hulu Selangor, Selangor (Sungai Kumbang) dengan kos kontrak sebanyak RM5,005,933.74. Projek ini telah disiapkan pada 21 November 2018; dan
- (vi) menaik taraf Jalan Persekutuan FT01 dari *Templar Park* ke Tanjung Malim.

Walau bagaimanapun, projek ini tidak diluluskan oleh Agensi Pusat dalam tempoh *Rolling Plan* 1, RMKe-11. Seperti mana Ahli Yang Berhormat sedia maklum bahawa, kementerian ini, melalui Jabatan Kerja Raya, adalah bertanggungjawab untuk memelihara dan menaik taraf infrastruktur di jalan-jalan persekutuan sahaja. Namun begitu, permohonan untuk memelihara serta menaik taraf infrastruktur jalan-jalan persekutuan ini adalah tertakluk kepada keutamaan dan permohonan yang dikemukakan oleh kerajaan negeri melalui JKR negeri masing-masing.

Kementerian Kerja Raya juga sentiasa komited untuk melaksanakan program penyenggaraan jalan di Jalan Persekutuan terutamanya penyenggaraan turapan serta memastikan dari semasa ke semasa semua Jalan Persekutuan sentiasa berada dalam keadaan selamat dan selesa untuk digunakan. Untuk makluman Ahli Yang Berhormat, bagaimanapun, permohonan menaik taraf atau penyenggaraan jalan raya yang dikemukakan akan dikaji terlebih dahulu oleh kementerian ini dengan mengambil kira pelbagai aspek teknikal seperti dapatan daripada kajian trafik dan Tahap Perkhidmatan atau dengan izin, *level of service* (LOS) bagi jalan raya tersebut.

Untuk makluman Ahli Yang Berhormat, Jalan-jalan Persekutuan yang rosak akan dibaiki segera oleh syarikat konsesi yang dilantik oleh kementerian ini. Skop kerja di bawah syarikat konsesi adalah termasuk skop kerja penyenggaraan rutin dan juga program penyenggaraan turapan secara berkala. Walau bagaimanapun, pelaksanaan program penyenggaraan ini adalah tertakluk kepada kelulusan peruntukan dari Kementerian Kewangan.

Bagi tahun 2019, setakat ini sebanyak RM2.86 juta telah diperuntukkan bagi program penyenggaraan berkala Jalan Persekutuan di Daerah Hulu Selangor. Untuk makluman Ahli Yang Berhormat juga, kementerian ini juga mengambil maklum akan isu keselamatan jalan raya di laluan tersebut. Bagi maksud ini, kementerian melalui Program Merawat Dan Memperelok Lokasi Kerap Berlaku Kemalangan yang dilaksanakan oleh pihak JKR bertanggungjawab untuk mengenal pasti dan memperbaiki lokasi kemalangan di jalan-jalan persekutuan tersebut yang dikenali sebagai kawasan *blackspots* untuk mengurangkan kemalangan yang disebabkan oleh faktor kejuruteraan jalan.

Perancangan pembangunan kawasan-kawasan industri di negeri-negeri adalah tertakluk kepada bidang kuasa Kerajaan Negeri masing-masing. Oleh yang demikian, cadangan pembangunan *UMW High Manufacturing Park* di kawasan Serendah serta pembangunan infrastrukturnya adalah di bawah bidang kuasa pihak berkuasa tempatan dan kerajaan negeri Selangor. Bagaimanapun, keperluan infrastruktur jalan raya di kawasan-kawasan ini kelak akan diambil kira sekiranya melibatkan jajaran jalan-jalan persekutuan terutamanya Jalan Persekutuan FT01 berikutan cadangan pembangunan *UMW High Manufacturing Park* untuk membangunkan kawasan Serendah selaras dengan keperluan pembangunan Kerajaan Negeri dan kewangan Kerajaan Pusat. Sekian, terima kasih.

Timbalan Yang di-Pertua [Tuan Nga Kor Ming]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 18 Julai 2019.

[Kamar Khas ditangguhkan pada pukul 2.48 petang]